

Date : 05 Oktober 2018
Title : Tiada lagi 'wahyu' untuk media
Publication : Berita Harian
Page : 8

MEDIA

Tiada lagi 'wahyu' untuk media

Kajang: Kerajaan sedia memberikan peruntukan kuasa undang-undang terhadap pembentukan Majlis Media Malaysia, dengan urusan pembiayaan dikawal selia Parlimen.

Penasihat Khas Media dan Komunikasi kepada Perdana Menteri, Datuk A Kadir Jasin, ketika mengumumkan perkara itu, berkata ia bagi memastikan pengurusan hal ehwal berita tidak dipengaruhi mana-mana 'tangan ghaib'.

Katanya, dasar kerajaan pasca Pilihan Raya Umum (PRU-14) ialah untuk melihat agensi media bebas menentukan hala tuju mereka, selain menerapkan pendekatan pendidikan dan kawalan sendiri.

"Memang kerajaan mahukan pembentukan (Majlis Media Malaysia) secepat mungkin, tetapi kerajaan tidak akan tubuhkan.

"Terpulang kepada anda untuk tubuhkan atau sebaliknya kerana kita tidak mahu wujud persepsi bahawa kerajaan ter-

babit dalam memberikan sebarang wahyu," katanya.

Beliau berkata demikian ketika menyampaikan ucapan pada Forum Media Kebangsaan 2018, bertemakan: 'Merealisasikan Kebebasan Media Era Pakatan Harapan' di Universiti Tenaga Nasional (UNITEN), di sini, semalam.

Menerusi siri perbincangan dengan pihak berkepentingan dalam industri media, A Kadir berkata, beberapa pertimbangan model perniagaan dicadangkan, selaras matlamat untuk mengekang amalan monopoli dalam kalangan syarikat berkaitan kerajaan (GLC) dan parti politik.

Monopoli media

"Kita memikirkan antara kaedah bagi memastikan media tidak dimonopoli ialah menerusi pelaksanaan model perniagaan secara koperasi atau pemegang amanah.

"Ia bukan soal kepentingan perniagaan sangat untuk men-



A Kadir Jasin

jamin kelangsungan industri, tetapi kita dalam keadaan apa sekalipun perlukan media.

"Bagaimanapun, kerajaan tidak dapat menolak (keputusan) beberapa pihak yang mengemukakan cadangan pemilikan korporat untuk mengambil alih media, tertakluk kepada persetujuan pemilik syarikat berkenaan.

"Dahulu (Datuk) Habibul Rahman (Kadir Shah) berpengaruh dan berkuasa terhadap media massa, justeru, mungkin wujud kemungkinan Majlis Media Malaysia mempunyai kuasa undang-undang tersendiri.

"Kita tidak mahu lagi wujud Habibul Rahman," katanya merujuk individu yang dikaitkan sebagai penasihat media kepada bekas Perdana Menteri, Datuk Seri Najib Razak sebelum ini.

Mengulas spekulasi masih wujud campur tangan luar pasca peralihan tampuk pemerintahan kerajaan, A Kadir menjelaskan, pihaknya tidak pernah mengarahkan mana-mana individu dalam lembaga pengarah syarikat media untuk 'undur diri'.

Beliau sebaliknya berkata, sebarang keputusan kepimpinan pengurusan tertinggi agensi media di negara ini adalah mengikut kapasiti peribadi, tanpa dipengaruhi pihak luar.

"Kalau dulu rasa komited terhadap kerajaan BN (Barisan Nasional), tetapi boleh berlaku adil dan tiada sikap berat sebelah untuk memikul tugas sebagai pengarang, maka kekal menyandang jawatan itu," katanya.